

**75 MANAGER Y
SUPERVISOR A
CERTIFICA DEN TAYER
EXCLUSIVO DI AHATA**



WWW.SOLODIPUEBLO.COM



SOLODIPUEBLO@GMAIL.COM

ACCIDENTE FATAL NA WARAWARA TA BIRA E DI 10 MORTO DEN TRAFICO

Ta trata di Eduardo Thiel naci na Aruba
dia 29 december 1970



**Abogado mr. Carlo a señala fayonan
den investigacion**

HUES A ORDENA PA LAGA SOSPECHOSO DEN CASO DROGA LIBER

**Parlamentario Shailiny
Tromp-Lee (MEP) ta
expresa preocupacion serio
pa silencio di Gobierno**

TOCANTE INTRODUCCION DI SALARIO MINIMO PA ORA Y JEUGDMINIMUMLOON



75 MANAGER Y SUPERVISOR A CERTIFICA DEN TAYER EXCLUSIVO DI AHATA



Oranjestad, Aruba: 5 December, 2025 - Aruba Hotel & Tourism Association (AHATA), den colaboracion cu Caribbean Hotel & Tourism Association Education Foundation (CHTAEF), a celebra e logro di 75 supervisor y manager durante un ceremonia di certificacion “Supercharged Bootcamp for Supervisors and Managers”.

E programa avansa di un dia, a ofrece un experiencia interactivo, practico y di hopi impacto, desaroya exclusivamente pa profesional cu tin di maneha retonan actual den e industria di turismo. E bootcamp tabata pa e gradua-donan certifica

anteriormente den AHATA su “Own Your Supervisory Authority Responsibly” bootcamp di 2023 te 2025, pa asina duna nan un oportunidad pa amplia nan conocimiento y fortalece nan capacidad di liderazgo.

E bootcamp ta diseña pa duna supervisor y manager e herment necesario pa guia nan team cu confiansa, subi nivel di rendimiento, y garantiza satisfaccion di cliente na un nivel excepcional. E parti-cipantenan a tuma parti den sesionnan di comunicacion avansa, coaching, strategia di responsabilidad, y excelencia den trabou di team.

Presidente y CEO di



AHATA, Sra. Tisa LaSorte, a felicita tur participante pa nan dedicacion y rol importante den nos economia. Sr. James Hepple, Tesorero di CHTAEF tambe a comparti palabra di motivacion y elogio. Sra. LaSorte hunto cu instructornan di e tayernan Sra. Louise John y Sra. Suzanne Shillingford-Brooks a entrega e certification na e participantenan durante un celebracion yen di energia positivo. E anochi a conclui cu un recepcion alegre pa participantenan y demas invitado por sigui celebra y conecta cu otro.


Durante e evento por a observa cu e supervisors di diferente compania a goza di conoce otro y siña di otro.

AHATA ta gradici Eagle Aruba Resort & La Cabana

Beach Resort pa nan aporte consistente cu ta permiti tayernan aki bira realidad y ta aprecia e aliansa valioso cu CHTAEF ta trece pa yuda eleva excelencia den servicio na Aruba.



ACCIDENTE FATAL NA WARAWARA TA BIRA E DI 10 MORTO DEN TRAFICO



Dialuna merdia pa 2:40 Central di Polis ta wordo notifica pa un accidente grave riba e caminda di Warawara na Santa Cruz E prome informa ta indica cu un pick-up mester a bolter y e chauffeur ta pega bao di e auto.

Di biaha a despacha patruya di polis, ambulance y brandweer cu maximo urgencia na e sitio di e sucedido. Na yegada ta topa cu un pick-up marca Toyota modelo Hilux color shinishi na unda e chauffeur ta pega bao di dje. Polisnan cu a yega na e sitio a logra saca e chauffeur y personal di ambulance a yega na e sitio y duna e chauffeur asistencia medico pero lamentablemente no por a haci nada pe. Especialista di trafico tambe polis tecnico a presenta pa asina haci nan investigacion.

Despues di un rato Dr.forensico Voskuil a presenta y a constata morto di Eduardo Thiel naci na Aruba dia 29 december 1970 (54 aña). Lamentablemente esaki ta bira e di 10 morto den trafico.

Cuerpo Policial ta manda palabra di condolencia na famia di e fayecido. Nos ta haci un suplica na tur automobilistanan: ta december e luna mas druk di aña, hopi druk pero esaki nifica pone MAS atencion, SIGUI reglanan di trafico, maneha sigur y NO tin pura.

Hunto nos por preveni un desgracia pa asina nos por pasa un Pasco sigur y un aña nobo serca di nos famia! Un trafico SIGUR pa un y TUR! □<This message was edited>





NoticiadiCorte

Abogado mr. Carlo a señala fayonan den investigacion

HUES A ORDENA PA LAGA SOSPECHOSO DEN CASO DROGA LIBER

ORANJESTAD – Awe mainta Hues a sigui cu tratamento di e caso penal cu Ministerio Publico a cuminsa contra e homber A.K., kende ta wordo sospecha di a importa marihuana y tabata bende droga.

SOLO DI PUEBLO por a compronde cu awe Hues a dicidi di laga A.K. liber pasobra e grabacion di interrogacionnan cu el a pidi di testimonan, cual mester a sosode, Fiscal a bisa cu no tin grabacionnan y lo mester laga Hues Comisario interroga e testimonan.

DECLARA LIBER DI IMPORTA DROGA

Ta asina cu 17 November 2025, Hues a tuma un decision intermedio. Hues a bisa cu abogado mr. Carlo a cuestiona pa declara Fiscal no admisible. E abogado a muestra cu tin documentonan cu a usa como prueba di parti di Polis cu no ta real y no a wordo haya na e cas di A.K. durante investigacion. E abogado a muestra cu por ta cu esakinan a wordo poni door di Polis despues. Ta asina cu Polis a presenta

A.K. cu esakinan durante interrogacion. Hues ta haya cu no tin motibo pa duda cu a trata A.K. incorrecto y a declara Fiscal no admisibel. Pa loke ta e importacion di droga, Hues a muestra cu 26 Mei 2025 e cacho anti droga a reacciona riba un catcha. A.K. a bisa cu riba e asunto di matanan di droga e no sa di nada. El a bisa cu el a cumpra algun net di muskita. Hues a bisa cu for di documentonan ta muestra cu berdad A.K. a busca net di muskita. Hues a sigui bisa cu ta aparece riba e documento number di A.K. y un otro persona. El a remarca cu no a haci investigacion riba e otro persona. Hues ta haya cu no tin ningun prueba cu A.K. lo a importa droga. Hues a declara A.K. liber di importacion di droga. A palabra cu 8 December 2025, lo sigui cu e caso caminda lo evalua interrogacionnan cu abogado mr. Carlo a cuestiona.

NO TIN GRABACION DI INTEROGACION

Hues a instrui Fiscal pa busca grabacion di interrogacion di dos persona: P. y R. Awe mainta Hues a bisa cu Fiscal a informa cu no a haya

grabacion di esakinan y ta sugeri pa laga Hues Comisario interroga P. y R.

Abogado mr. Carlo ta haya cu mester stop cu e tipo di cosnan aki y mester haci husticia na favor di A.K. E abogado a bisa Hues cu teniendo cuenta cu sentencianan recien den caso di marihuana, mester laga A.K. liber, pendiente di e interrogacion na Hues Comisario.

Hues a puntra A.K. kico e ta pensa. A.K. ta haya cu ta basta di ta 6 luna sera y no tin claridad. El a puntra kico ta pasado. E ta un asunto personal of kico realmente ta pasando.

SOSPECHOSO LAGA LIBER

Hues a pospone e caso un rato pa e evalua. Ora el a bolbe den sala di Corte, el a bisa cu e ta haya cu mester scucha e testigo P. na Hues Comisario. Hues ta haya cu tur e tardamento aki pa haya claridad, mester laga A.K. liber. El a ordena pa awe mes, laga A.K. liber. Hues a pospone e caso pa Februari 2026.

**TUMA ACCION PA
PREVENI, PROTEHA Y
STOP DENGUE
CON NOS POR STOP
DENGUE?**



PARLAMENTARIO SHAILINY TROMP-LEE (MEP) TA EXPRESA PREOCUPACION SERIO PA SILENCIO DI GOBIERNO TOCANTE INTRODUCCION DI SALARIO MINIMO PA ORA Y JEUGDMINIMUMLOON ENTRANTE 1 DI JANUARI 2026

Cu solamente simannan pa bay prome cu 1 di Januari 2026, e fecha stipula pa e introduccion di un salario minimo pa ora y e Jeugdminimumloon, Parlamentario Shailiny Tromp-Lee ta expresa su preocupacion serio riba e silencio total di parti di Gobierno y e falta di preparacion pa e cambionan laboral crucial aki.

Cambio di ley pa introduci e salario minimo pa ora entrante 1 di januari 2026 a keda aproba na Parlamento dia 1 di september 2025, y un mocion presenta pa su persona pa introduci e jeugdminimumloon entrante 1 di Januari 2026 a haya sosten unanime den Parlamento riba e mesun fecha menciona. E aprobacion di e cambionan aki ta un victoria pa proteccion di nos trahadonan y hobennan riba e mercado laboral. Sinembargo, e implementacion exitoso ta rekeri un plan di trabou detaya, administrativo, legal y, mas importante, comunicativo.

Falta di Campaña di Conscientisacion y Transparencia lamentablemente, te dia di awe, no tin ningun campaña di conscientisacion ni

informacion a cuminsa. Doñonan di trabou y trahadonan, kendenan mester ta prepara pa e cambionan aki, ta keda sin e informacion y e asistencia preparativo necesario.

E falta di accion aki ta keda un misterio, specialmente mirando cu di dia 13 di oktober 2025 (y a rapela esaki dia 4 di December 2025) mi a dirigi un set di preguntanan detaya por escrito, via Presidente di Parlamento, na Minister Cecilia, caminda mi ta pidi claridad riba entre otro:

- E status di e Landsbesluit (decreto) pa introduccion di e jeugdminimumloon.
- E plan di trabou detaya pa implementacion (administrativo, legal, comunicativo) pa loke ta trata e jeugdminimumloon.
- E fundeshi pa e cifra di 70% cu a wordo menciona den un comunicado como e porcentahe pa stipula e jeugdminimumloon.
- E plan di comunicacion y control di Departamento di Labor pa loke ta trata e introduccion di un salario minimo pa ora.
- E status di e "noodzakelijke uitvoeringsmaatregelen" pa preveni impactonan negativo, manera aumento di prijs of retiro di



personal, manera e mocion unanime a urgi.

Un luna y mei despues y ainda e preguntanan aki ta sin contesta

Segun Parlamentario Tromp-Lee e silencio di Gobierno ta inaceptabel. No por warda te ora cu e ley drenta na vigor pa cuminsa informa y educa nos comunidad. Gobierno tin e obligacion pa mostra e respet debido na Parlamento dor di contesta preguntanan, y na comunidad dor di implementa e ley di un forma responsabel y transparente.

Pesey mes Parlamentario Tromp-Lee ta urgi Minister pa duna cuenta inmediatamente y bin cu e plan di comunicacion

y implementacion, pa asina por garantiza cu e introduccion di e salario minimo pa ora y e jeugdminimumloon ta bay

corectamente entrante 1 di januari 2026, manera ta stipula y manera nos trahadonan merece.


Clasificados



SOLODIPUEBLO@GMAIL.COM
CEL. 585 9500



DIA MUNDIAL DI SUELA 2025: E FUNDESHI SCONDI DEN NOS CIUDADNAN



ORANJESTAD - Dia Mundial di Suela (World Soil Day), e aña aki ta dedica na e tema "Suela saludabel pa ciudadnan saludabel". Ta celebra e dia aki tur aña riba 5 di december. E dia aki a bira un movimiento mundial enfatisando e rol cu suela tin pa siguridad di cuminda, ecosistema y bienestar humano. Food & Agriculture Organization (FAO) di Nacionnan Uni, via su Aliansa Mundial pa Suela a ricibi e mandato na 2014 pa organisa e dia mundial di Suela. Tur aña, e tema di e dia mundial aki ta pone enfasis riba e problema di suela. Directie Natuur en Milieu (DNM) ta scoge pa elabora un poco mas riba e tema, kico esaki ta nifica pa Aruba y con por eleva conscientisacion.

DNM su enfoke ta bay riba e importancia cu e tera bou di nos pianan tin den nos comunidad urbanisa; pues den nos ciudad. Pa un isla manera Aruba, cu un poblacion cu ta crece cada dia, e tema aki ta hopi relevante. Ta importante pa para keto na e pregunta si nos suela ta uno saludabel. Pasobra e tereno urbanisa ta provee servicio esencial pa nos ecosistema ta apoya produccion di cuminda,

ta filtra awa, ta warda carbon organico, ta regula temperatura y ta sostene biodiversidad. Tin un necesidad pa e espacionan urbanisa y e suela por garantiza cu hende y naturalesa ta prospera hunto den ciudadnan cu ta saludabel.

Mas cu 95% di nos cuminda bin fo'i e suela. Sin embargo, den bista di cambio di clima y actividadnan humano, nos suela ta degrada. Erosion den forma acelera ta reduci filtracion y disponibilidad di awa. Esaki ta reduci e nivel di vitamina y nutrientenan den cuminda. Practica sostenibel di maneho di suela, ta reduci erosion y contaminacion. E ta yuda mehora filtracion y wardamento di awa. E practica ta yuda preserva biodiversidad, mehora fertilidad y ta yuda absorba carbon organico; tur esakinan ta hunga un rol crucial den e lucha contra cambio climatico.

Suelanan saludabel den nos areanan urbanisa no ta solamente tera; nan ta un infraestructura scondi cu ta ofrece beneficianan cu ta haci nos ciudadnan mas fresco, mas berde, mas saludabel cu mata.

1. Berde y clima fresco (Resiliencia di Clima)

Suelanan den ciudadnan ta capta calor y asina ta aumenta gasto di coriente manera di airco. Suelanan saludabel cu vegetacion ta yuda:

- Crea ciudadnan mas fresco: e temperatura ta uno agradabel pa recrea y cana

haci compras.

- Absorb'e awa di yobida: suela ta sirbi, manera un spons cu ta absorba aproximadamente dies milimeter di awa sero. Asina ta reduci e riesgo di inundacion y daño na e infraestructura den ciudad.

2. Cas pa bida (Biodiversidad y Resiliencia)

Capa di cement, contaminacion y fragmentacion di suela ta afecta productividad y biodiversidad den suela (e tera) y ta esencial pa esaki ta uno saludabel. Suela ta cas pa mas o menos 59% di e especienan den tera, manera micro organismonan. Protehando e suela aki ta mantene:

- Ciclo di nutriente y filtracion di awa: ta elementonan critico pa un ambiente di urbanisacion saludabel.

- Ecosistema di polinizacion: ta importante pa e areanan natural berde y tambe agricultura.

3. Mas saludabel y sigur (Calidad di Bida)

Trafico, industria, sushedad, kimico den pesticida y 'fertilizer' y otro desperdicio ta contamina e suela di e area urbanisa, y ta menasa nos salud.

Identificacion di e problemanan, un bon maneho y restauracion di suela ta:

- Preveni malesanan: reduci riesgo di malesanan manera cancer door di crea un ambiente di bida mas limpi y saludabel.

- Siguridad pa agricultura den areanan urbanisa: duna sosten na cunucunan, practica



di horticultura y crea espacionan natural berde cu mata unda por cultiva cuminda na un manera sigur pa propio uzo.

4. Di sushi pa rikesa (Maneho di desperdicio organico)

Aruba su centro di ciudad, manera mayoria ciudadnan na mundo, ta produci hopi sushedad. Mayoria ta di desperdicio organico. Ora cu procesa esaki manera den compost, e resto organico aki ta yuda:

- Debolbe nutriente den suela: En bes di un problema, desperdicio organico ta bira un "rikesa pa e suela" cu ta sostene agricultura y espacionan natural berde y ta transforma ciudadnan den aliadonan cu ta yuda combati cambio climatico. Kico tur esaki ta nifica pa Aruba;

Pa nos isla chikito, proteccion di suela no ta un luho, sino un necesidad strategico.

Perdida di suela fertil:

Urbanisacion (desaroyo y construccion) ta conduci na perdida di tera fertil. Aruba por implementa un miho planificacion di tereno y marando esaki na proteccion di e tiki cunucu cu nos tin, por garantiza siguridad alimenticio.

Inverti den suela: Inverti den suelanan saludabel ta 'cost-effective', asina ta spaar placa na combati inundacion y cuido medico. Suelanan cu ta funciona bon ta proteha nos infraestructura y bienestar di nos habitantenan.

E fundeshi di un Aruba mas fuerte, mas fresco y resistente ta cuminsa bou tera, den e suela. Laga nos reconoc'e y inverti den nos suelanan urbanisa, como cu e ta un 'infraestructura invisibel' cu ta sostene nos. Dia Mundial di Suela 2025 ta un yamada pa tuma accion pa asina un y tur yuda proteha nos suela den areanan urbanisa of den ciudad.

Un excelente teamplayer cu actitud proactivo **VICTOR GOMEZ TA EMPLEADO DI LUNA DI NOVEMBER 2025 NA HOH**



Tur luna Horacio Oduber Hospital (HOH) ta elogia un colega cu di un forma of otro ta destaca y pa luna di november 2025 a toca turno na Victor Gomez. Victor ta un tecnico di e aparatonan medico y ta forma parti ya pa mas di 17 aña caba di e team tecnico di HOH. Ora ela drenta un reunion importante ela ripara cu no ta pa reunion ela yega. Un sorpresa grandi pa Victor ora cu ela topa cu famia y un sala yena di coleganan, management y representante di Hunta di Directiva. Un momento festivo unda cu bunita palabranan no a falta y sigur e lo hiba cune pa semper.

Victor su nominacion a wordo entrega door di su team a base di e balornan di TRUSTED di Hospital. Victor ta un excelente 'teamplayer' cu ta contribui activamente na un ambiente positivo di trabou. E ta yuda su coleganan te unda cu e por y ta purba

mehora e eficiencia den departamento pa asina procesonan tecnico cana miho y sin problema. E no ta huzga otro, ta scucha preocupacionnan y ideanan di otro colega, ta comunica di un manera habri, cu respet y su feedback ta semper constructivo.

Victor su conocimiento tecnico y manera di soluciona problema ta impresionante. Sea ta trata di mantencion, fayó of reparacionnan complica, aparatonan mester traha bon sin problema. Y tambe segun exigencianan stipula pa fabricante y certifica, pa asina por duna e servicio di calidad cu tin mester na nos pashentnan. Por pensa riba aparatonan medico cu ta uza na camber di opepracion, radiologia, endoscopia, funcie, laboratorio y hopi mas. Victor semper ta entrega trabou di calidad halto. E ta traha diligente, eficiente y cu'n actitud profesional cu ta duna confiansa den

su experticio. E ta dedica na su trabou y na Hospital: Victor ta involucra su mes activamente pa procesonan di mehoracion y inovacion riba su departamento cu na final tin un influencia positivo riba su departamento pero tambe indirecto na pashent y Hospital completo.

Victor ta un persona cu gusta su trabou y ta super motiva y alabes ta trece ambiente na su team. Ela demostra su balor pa hospital y merece e bunita titulo di ta empleado di luna. Hunta di directiva y team completo di HOH ta felicita Victor pa e bunita reconocimiento como empleado di luna di november 2025. Masha pabien Victor!



BAKI DEN BARIO NA SAN NICOLAS: MAS DI 455 VEHICULO A ACUDI YAMADA PA TENE NOS ISLA LIMPI



Diasabra mainta tempran, un gran cantidad di auto tabata den fila caba pa asina uni na e esfuerso di un Aruba mas limpi. E accion di Baki den Bario a bira un alivio grandi pa e comunidad. Por mira esaki den e exito di cada accion.

Un total di 455 vehiculo pa presenta pa asina haci uzo di e oportunidad di deshaci di nan sushi. San Nicolas y vecindario a prepara durante siman pa asina cu diasabra a yega, nan por a cuminsa transporta e desperdicio na e localidad asigna.

E biaha aki un total di 12

baki di SERLIMAR y 43 di Ecotech a keda uza durante e accion di Baki den Bario. Tur departamento y instancia cu ta froma parti di e accion aki tabata presente y asina coordina cu e team, como tambe Polis di Bario pa e miho fluho di trafico posibel.

Esaki lo tabata e penultimo accion di Baki den Bario. Durante siman lo anuncia cua ta bira e ultimo accion pa 2025. Mester tene na cuenta cu cada biaha ta scoge un localidad cu por acapara e accion aki, como cu e mester ta un veld grandi y cu accesibilidad facil pa e trafico.

Gabinete AVP-Futuro ta sigui haci su maximo esfuerso pa logra e limpieza rond nos isla, den cada bario y cu cada accion ta yega cada biaha mas cerca di e meta aki. Comunidad tambe a sostene grandemente e iniciativa aki y ta haci bon uzo di cada accion di Baki den Bario.

Pronto lo anuncia tambe e ubicacion di e bakinan permanente rond nos isla. Esaki pa a brinda pueblo un luga fiho pa deposita desperdicio, sin costo alguno.



Minister Geoffrey Wever: SEÑOR WALTER E. MOSHER APUNTA COMO DIRECTOR NOBO DI FREE ZONE ARUBA N.V.

Oranjestad, 8 december 2025 - Minister di Finansa, Asunto Economico y Sector Primario, mr. Geoffrey Wever, den calidad di representante di Land Aruba como unico accionista di Free Zone Aruba N.V. (FZA), ta anuncia cu señor Walter E. Mosher a wordo oficialmente nombra como director nobo di FZA, cu fecha di inicio 1 februari 2026. E nombramento aki ta representa un paso importante den fortalecimiento institucional y modernizacion operacional di un entidad cu tin un rol strategico den diversificacion economico di Aruba.

“Mi ta sumamente contento cu Sr. Walter Mosher a haci su mes disponible pa lidera Freezone den e era nobo y mi tin tur confianza den su profesionalismo y expertisio. Sr. Mosher ta un profesional Arubiano cu hopi experiencia local y internacional y ta hopi bon prepara pa e tarea aki. Mi ta contento cu un Arubiano, cu pa hopi ana tawata biba den exterior, awo ta bin back cas pa traha pa Aruba”, segun Minister Geoffrey Wever.

Señor Mosher ta un ehecutivo cu un trayectoria amplio y multidisciplinario tanto na Aruba como na Europa. Mosher a inicia su carera como Economista na Banco Central di Aruba, sigui pa ocupa diferente posicion clave na AIB Bank N.V., incluyendo Vice

Presidente di Corporate Finance. Ademá, Mosher a fungi como Managing Director di Aruba Aloe, un rol den cual e a fortalece su capacidad di liderazgo y maneho operacional.

Despues di su etapa profesional na Aruba, señor Mosher a amplia su preparacion internacional cu estudio avansa, incluyendo un Executive MBA for di ESADE Business School, adiciona na tres Master's den international business, economics y digital business. Su experiencia internacional ta inclui cargonan senior na Ernst & Young na Dublin—caminda e a guia proyecto y conseho na gobierno y empresa priva riba tereno di infraestructura—y na ESB, e empresa nacional di energía na Irlanda, unda Mosher a traha riba desaroyo y ehecucion di proyecto den energia renobabel.

E combinacion di experiencia regulatorio, bancario, retail, infraestructura y energia ta pone señor Mosher den un posicion excepcional pa contribui na fortifica y crecimiento duradero di Free Zone Aruba N.V.

E nombramento di señor Mosher ta resultado di un proceso riguroso cu a wordo implementa pa e Junta di Comisario di FZA y un HR-consultant externo. Durante e proceso di solicitacion publico un

grupo di candidato prometedo a wordo evalua, incluyendo consulta profesional for di un HR-consultant externo. Despues di intercambio repetitivo, evaluacion tecnico y consulta interno cu Minister Wever, cu e Junta di Comisario y señor Mosher a logra un acuerdo riba tur condicion contractual.

Minister Wever a expresa su reconocimiento na e Junta di Comisario pa guia FZA den un periodo di transicion cu tabata tin su retonan. E restructuracion di FZA, incluyendo e implementacion di un plan di abordacion y un roadmap strategico, asina como e instalacion di un Junta di Comisario nobo, a crea e base pa un direccion mas solido y transparente. Den su papel di accionista y minister responsabel, Minister Wever a enfatiza cu e nombracion di un director nobo ta un elemento esencial den continuacion di esfuersonan pa fortalece maneho, operacionalisa reformanan y prepara FZA pa un rol mas competitivo den mercado internacional.

Segun Minister Wever, Free Zone Aruba tin potencial pa bira un motor di crecimiento y innovacion, especificamente den un epoca unda Aruba ta busca pa diversifica e base economico riba manera duradero. E nombramento di señor Mosher, cu su experiencia tecnico, financiero,



regulatorio y internacional, ta fortalece e capacidad di FZA pa atrae actividadnan nobo, crea oportunidad pa exportacion y posiciona Aruba den un mercado global mas competitivo.

Pronto e lista di actividadnan nobo cu por wordo haci for di Freezone lo wordo anuncia, un paso cu lo habri porta pa companianan y projectonan innovador den e ecosistema economico di Aruba.

Minister Wever ta finalisa expresando su gradecimento profundo na e Junta di Comisario, e team operacional di FZA y tur instancia gubernamental y consultant tecnico cu a contribui na e proceso di seleccion. E nombramento di señor Mosher ta marca oficialmente un era nobo pa Free Zone Aruba.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



CAS DI CULTURA TA LANSA OFICIALMENTE CAMPANA DI RECAUDACION DI FONDO PUBLICO E BRASA



Oranjestad, Aruba – Den weekend di fin di november, Cas di Cultura a duna inicio na un capitulo nobo den e historia cultural di Aruba cu e lansamento oficial di su campaña publico pa recauda fondo, E Brasa, durante e prome anochi di e evento Cas di Pasco. Publico na e mercado di pasco festivo aki por a wak y scucha e estreno di e campaña su jingle-produsi pa Steve Andreas y canta pa Freddy ‘Rasta’ Richardson, y video promocional, celebrando e vision di e centro cultural pa revitalisa su edificio historico y sigura e futuro di arte, presentacionnan y eventonan cultural riba e isla. E lansamento a wordo ricibi cu emocion di publico, artistanan y sostenedornan di comunidad, marcando un comienso inspirativo pa e

campaña.

E campaña di E Brasa ta un iniciativa crucial cu e meta pa renoba y modernisa Cas di Cultura, garantizando cu e ta keda un espacio vibrante pa presentacionnan, exposicionnan, musica, baile y encuentronan di comunidad pa generacionnan benidero. Cu renobacionnan andando, e campaña ta invita publico pa participa pa medio di donacionnan di cualkier tamaño — cada contribucion ta hunga un parti den mantene arte y cultura di Aruba.

“Nos evento di Cas di Pasco tabata un momento realmente special pa Cas di Cultura y henter e comunidad,” Vicky Arens, Directora di Cas di Cultura a bisa. “E lansamento di E Brasa ta tocante mas

cu renoba un edificio — e ta tocante conserva un espacio caminda historianan ta wordo comparti, artistanan ta crece, y nos herencia cultural ta haya bida. Nos ta yama tur hende bon bini pa join nos den e capitulo nobo y emocionante aki.”

E campaña a resalta durante e prome anochi di Cas di Pasco (28 di november), cu a conta cu musica festivo, bandanan popular di gaita, cuminda di pasco, y un vitrina di artesanía local. E mercado di pasco a sigui dia 29 di november, ofreciendo un otro dia di celebracion festivo y compromiso cu comunidad.

Donacionnan na e campaña di E Brasa por wordo hasi online a traves di e website oficial di Cas di Cultura (www.casdicultura.aw), na oficina of personalmente na eventonan benidero. E campaña ta ofrece diferente opcion di donacion pa hacie facil pa tur hende contribui, asina por yuda forma e futuro di e teater.

Erenobaciontincomometa pa mehora accesibilidad, mehora facilidadnan pa presentacionnan y exposicionnan, y provee un ambiente acogedor pa tur bishitante. E campaña ta enfatisa participacion di comunidad y ta celebra e esfuerzo colectivo di clientenan, negoshinan, y amante di cultura cu ta reconoce e importancia di conserva e herencia artistico di Aruba.

Pa mas informacion tocante e campaña di E Brasa of pa hasi un donacion, bishita www.casdicultura.aw of manda



un email na info@casdicultura.aw.

Tocante Cas di Cultura Cas di Cultura ta e teatro nacional y centro cultural di Aruba, ofreciendo un plataforma pa musica, baile, teatro, exposicionnan, y eventonan comunitario.

Desde su fundacion, el a hunga un rol central den alimenta talento local y conserva e herencia cultural di e isla. E teatro ta sigui ta un luga di encuentropa habitantenan y bishitantenan experiencia e rikesa di e comunidad artistico di Aruba.

Cede di BBQ Cushina di Nestor

Diadomingo 7 di dec.

Menú

Ham di pasco
1/2 galinja jena
Roast beef mushroom sauce
Lomito mushroom sauce
Bbq mix
Galinja
Loinribs
Lomito
Pincho
Special
Salada batata
Aros con pollo

**Pa pedido por jama
riba 7497071.**
Of pasa na Siribana 45b St Cruz.

Nos kier desea un y tur un
felis dlanan di fiesta



Centro di Bario Noord a culmina “LET’S ACT Aruba” ciclo 2025 cu presentacion oficial



NOORD - Diabierna anochi, Centro di Bario Noord a presenta cu gran orguyo e presentacion oficial di “LET’S ACT” Aruba, celebrando e esfuerso, talento y progreso di tur participante. Despues di algun luna di entrenamiento intenso, den un gala cultural yen di energia y emocion, participantenan a subi escenario pa muestra fruto di nan preparacion, representando disciplinanan di Teatro, Canto, Cuarta y Folklore. “LET’S ACT” Aruba ta un iniciativa socio-cultural, un colaboracion innovador

entre Fonds voor Cultuurparticipatie (FCP) y CEDE ARUBA, diseña pa fortalece participacion cultural den e parti Caribense di Reino. “LET’S ACT” Aruba ta crea oportunidad pa nos muchanan participa den un programa estructura, dedica na desaroyo di talento, creatividad y expresion personal. Por medio di guia, mentoria y practica constante, e programa ta fortalece confianza, disciplina y habilidad artistico den nos muchanan. E anochi tabata un fecha


hopi mas special, mirando cu dia 5 di December, ta e gran cumpleaños di Sinterklaas, kende a pasa bishita na Centro di Bario Noord, hunto cu su Pietnan, pa saluda tur muchanan bon mucha presente. Mama Claus tambe a haci acto di presencia, agregando alegria y ambiente festivo na e ocasion. Durante e evento, publico a gosa di un dramatisacion di nacemento di nos kerido “Niño Hesus.”

Centro di Bario Noord ta expresa un gran danki special na Meneer Rocky y Erwin, pa nan dedicacion, pasenshi y amor den traspasa nan conosemento na nos muchanan. Nan aportacion ta fundamental pa e desaroyo continuo di talento den bario. Danki tambe na tur mayor, tur mentor, y tur hende cu ta sostiene Centro di Bario Noord y ta sigui muestra confianza den Centro. Un danki special na Meneer Rocky y Erwin pa nan dedicacion y amor pa traspasa nan conocimiento na nos muchanan. Y na tur mayor cu ta brinda Centro di Bario Noord nan confianza. Tambe, un danki special na Pittbull Singing Production di Ruth Gaarie pa nan bunita presentacion durante e anochi aki. Alabes nos ta gradici Jermaine Acosta y Madelene Kelly y nan elenco pa e dramatisacion di nacemento di nos “Niño Hesus.” Un gesto hopi aprecia a yega di banda di Elmar, cu a regala e muchanan buki di cuento di



Chispito, un spaarpot pa stimula habito di spaar, y un kleurboek tematico—detayenan cu ta contribui na creatividad y formacion positivo. Ademá, Centro di Bario Noord ta muestra su gratitud na Sharp Productions & Entertainment pa nan sponsor di zonido, y na Elmar pa nan

give-away items. E evento di anochi tabata manera un testimonio di kico comunidad, cultura y union por logra hunto, continuando asina Centro su vision pa sigui stimula e desaroyo, crecimiento spiritual, social, cultural y deportivo di e dushi pueblo di noord. Centro di Bario Noord—Creciendo Hunto!



SABIDURIA DEN NOS ALEGRIA

Skirbi pa Ruthy”Lady Ruth”Vrieswijk-Bergen



Saludos mi dushi hendenan ! Especialmente na nos grandinan cu ta gusta lesa nos relato cu hopi atencion y curason. Corda shonnan, no ta tur di nos grandinan, nos adultonan mayor sa traha cu celular, ipad of laptop. Incluyendo Lady Ruth cu no ta domina tur cos den e mundo digital. Pero nos tambe ta hasi nos best y ta contento cu ora e pega su casa ta salb'e. Danki na Lady Ruth su bon amigo Dr. Ike Posner pa cu ayudo di AI laga pone bunita y dushi melodia den e poemanan skirbi y comparti ariba facebook como canticanan bunita. Ike ta un di nos cabayeronan cu curason grandi pa su dushi famia y su pueblo, un super bon dokter. Disfrutando di su penshoen bon mereci y cu mas bunita proyectonan y actividadnan su dilanti riba su caminda. Ike a yuda mi bunita y dushi mama Mercedes cu su dolornan di pia, hopi anja pasa. Naaaah, awe nos no ta menciona nada di e Klachtencommissie di HOH, simplemente nos ta wardando riba nan invitacion pa e Hoorzitting. Varios persona a remarca na nos, cu, pa nos bon y firme intencion tuma contra nan, nan a cuminsa ta post hopi cos positivo di hospital den corant y esey ta bon, pa sigui muestra cu tin cos bonnan tambe ta sosode

den HOH y cu no ta tur trahando eynan ta fayando y negligiendo patient. Enfin, awe nos ta desea di felicita e comishon di Social Fonds Colegio Nigel Matthew pa nan exitoso fundraising dinner na O'Neils kitchen den curason di San Nicolas. E cuminda tawata super pero super dushi ! Nos ta manda un “bearhug” di pabien tambe pa Greta, nos amiga di tempo di Radio Kelkboom su departamento di bende piezanan electronico e.o. den Emmastraat Oranjestad. Siii, Emmastraat y no Emanstraat. Mi amiga Verna y ami a topa cu Greta den The Bean Corner den curason di Noord cu un grupo di amiganan celebrando Greta su Happy Birthday ! Papiando di un bon coffeepiece, Verna y Lady Ruth a topa tambe cu un colega Poeta escritor, e guapo Erick McDowell y su bunita ruman muhe Angie den Palapa Coffee place banda di e oficina di Dr. Cabenda nan ey, na unda nos a disfruta di un dushi french toast tur dorna di berries y strawberries masha masha dushi mes ! Erick a keda sorpresa cu Lady Ruth tawatatin un paraplu cu ne, su custumber y tradicion artistico ora di bay Poetry Night. Tawatatin e paraplu pasobra awa tawata yobe, ahaaaa !!

Pero locual a alegra Lady Ruth su humilde curason recientemente mas ainda, tawata su encuentro den Win Tung cu un bunita sra. cu a reconose nos y a duna nos un compliment pa nos bunita relatonan. Sra. Evelyn Govaard a bisa nos cu e ta hanja nos relatonan semanal interesante ! Nos a hasi uso di e bunita momento aki pa a laga un persona saca nos potret cu awe nos ta share e den nos relato cu hopi amor y carino ! Ta e temporada di mas dushi di anja, e temporada di mas luz y mas paz ! Y aunke nos Pascu e anja aki, sin nos mayornan fisicamente, den nos curason nan tey pa semper !

Nos lo recorda hopi di nos dushi momentonan comparti durante anjas y anjas cu Papa cu Mama ! Manera e bunita lijshie rondo cu nos a hanja regalo serca lieve Anna, mi schoonzusje, ta bisa :” For ever remembered, For ever Loved”. Y esey nos ta sinti, ora nos ta keiro rond den auto wak e lusnan bunita na e diferente rotonden. E bunita lusnan dornando Tamarijn Divi Hotel. Of e bunita lusnan den cura di Elmar. Corda dal un keiro tambe den Flora Market cu nan decoracionnan super pero super nice ! Lady Ruth ta conclui su relato gradiciendo tambe Aruba Bank pa e extra tasjesnan cu nos a usa pa traha basket di Pascu yena nan cu cos dushi pa e.o. nos balente trahadornan di Serlimar pa nan bon trabao durante henter anja na nos cas y pa 3 amiga cu ta yudele bon . Un carinjo di nos curason pa nan cu hopi aprecio, gradicimento y amor. Danki tambe pa e calender, hopi bunita y e sunshades nan cu mi casa a gusta un mundo ! Danki pa lesa nos relato atrobe cu hopi atencion,



un bon dia colma di salud, alegria y sabiduria ! Un “bearhug” grandi diki gordo di Lady Ruth. Corda cuida, tene cuidao unda y con ta cana den cas y of den cura, pa no cay kibra heup ! Cuida curpa, bebe suficiente awa. Yuinan, duna boso

grandinan atencion den amor y boso bishita regularmente. Ta hasi hopi dolor perde bo mama y despues bo tata tambe den asina corto tempo. Pero Dios mes ta duna consuelo. Muestra y demostra nan amor tur dia !!!!

ARUBA Y INDIA TA FORTALECE LASO BILATERAL DURANTE BISHITA OFICIAL DI EMBAHADOR



E PIKA CONDENABEL DI ADULTERIO

Bo no sa, cu unabes cu bo ta casa pa Dios den e Sacramento di Matrimonio, bo ta keda casa pa Dios te na morto y Dios no ta reconoce divorcio. Awor, si bo ta un hende divorcia y bo ta biba cu otro, anto ta con bo por yama bo companjante bo esposo of bo senjora maske cu boso ta casa pa raad? Bo no tabata sa cu bo ta bibando den e pika condenabel di adulterio? Bo sa cu e pika di adulterio ta condenabel pa Dios y na tur esnan cu a muri den nan pikanan di adulterio, nan lo no drenta den e Reino di Dios y nan destino lo ta den fierno of den purgatorio. Bo mester compronde cu e di 6 Mandamento di Dios Tata ta bisa bon cla: “Lo bo no comete e pika di adulterio.” Lesa den Bijbel Mateo 5: 32, na unda Senjor Hesus ta adverti bon cla: “Ami ta bisa boso: Ken cu divorcia di su senjora, si no ta pa motibo di infidelidad, e ta pone su senjora comete adulterio. Es cu casa cu e senjora divorcia, e tambe ta comete adulterio.” Akinan nos por compronde bon, si un homber divorcia di su senjora, anto e ta provoca cu e senjora ta bay busca un otro persona pa biba cun'e den e pika di adulterio. Akinan e homber cu a divorcia di su senjora, ta keda responsabel di su senjora cu el a divorcia. Y tambe e homber ta keda responsabel di su senjora cu ta bay perdi den e pika di adulterio.

Na e dia di huicio dilanti di e tribunal di Dios Tata, e homber y e muher tin di duna cuenta di nan actonan di divorcio y di adulterio. Lesa den Bijbel Marko 10: 6-9 : “Na principio di creacion, Dios a traha homber y muher, p'esey e homber lo laga su tata y su mama pa e uni cu su

muher y nan dos lo bira un solo curpa. Di manera cu nan no ta dos mas, sino un solo curpa. Pues loke cu Dios a uni, no ta permiti pa hende separa.” Esaki ta e Sacramento di Matrimonio di Dios den Misa, na unda cu Dios ta uni e pareha den un solo curpa, pa medio di un sacerdote y cu dos testigo. Tambe bo por compronde, cu Dios no ta reconoce divorcio y e pareha mester keda uni te na morto, maske cu nan a divorcia pa raad.

Dia cu bo a casa den e Sacramento di Matrimonio den Misa pa Dios, bo no a huramenta pa Dios dilanti di altar, cu bo lo keda fiel den bon tempo y den tempo di adversidad, den tempo di abundancia y den tempo di pobresa, den tempo di salud y den tempo di enfermedad, den tempo di pas y den tempo di pleito y di stima otro manera bo mes y di keda fiel te na morto?

Awor mi ta puntra bo, ta na unda bo huramentonan a keda dilanti Dios? Laga nos lesa den Bijbel Mateo 5: 33, na unda cu Senjor Hesus ta bisa tocante huramento : “Tambe boso a tende loke a ser bisa na boso antepasadonan: Lo bo no kibra huramento y lo bo cumpli loke cu bo a huramenta na Senjor.” Akinan, bo no a huramenta dilanti di Dios den Misa, di keda hunto y fiel cu bo pareha te na morto? Den Bijbel Huan 4: 5-42, akinan nos por lesa, ora cu e muher Samaritana a pidi Hesus p'e haya e awa di bida eterna, p'e no haya sed di awa nunca mas, anto Hesus a bise, bay busca bo esposo y bin cun'e cerca Mi. E muher Samaritana a bisa Hesus, mi no tin esposo, anto Hesus a bise'le, bo tabata tin 5 homber y e homber cu bo ta bibando

cun'e awor, no ta bo esposo. Akinan nos por compronde cu e muher Samaritana ta bibando den e pika grandi di adulterio, pasobra ela divorcia di su prome casa, pa despues ela bay biba cu diferente homber den e pika di adulterio. Akinan tambe, Senjor Hesus ta bisa na tur esnan cu a divorcia y ta bibando den e pika di adulterio, pa nan bay busca nan senjora of nan esposo cu Dios a uni nan den e Sacramento di Matrimonio, pa e pareha cu a divorcia por ta salba di e condenacion den fierno. Bo no tabata sa, si bo muri den bo pika di adulterio, bo no por drenta den e Reino di Dios. Lesa den Bijbel 1 Corinthionan 6: 9 y 10: “Boso no sabi, cu e inhustonan lo no drenta den e Reino di Dios? No ganja boso mes, pasobra ni e fornicadornan, ni e adoradornan di diosnan falso, niesnandenadulterio, ni e homosexualnan, ni e ladronnan, nieburachenan, ni e blasfemadornan, ni esnan golos pa plaka, ni e abusadornan, nan tur lo no drenta den e Reino di Dios.” Tambe den Bijbel Testament Bieuw Levitico 20: 10, na unda cu Dios Tata ta bisa: “Si un homber ta comete adulterio cu un muher casa di su prohimo, nan dos lo muri, e adultero y e muher adultera.” P'esey cambia boso bida prome cu ta laat, pa boso no ser condena den e candela di fierno despues di morto.

Scirbi pa Seferino Tromp

Please pa publika.
Di antemano masha danki.

.
Seferino Tromp
Koyari 13-D tel. 5931157 /
5870048
ID. 57.11.22.40
Email: etajuni@yahoo.com

EXITOSO ENCUENTRO PA STUDIANTE RIBA E TEMA DI BUDGETTERING



Den Haag – Na Haagse Hogeschool a tuma lugar un encuentro di Gabinete di Aruba pa studiantenan Arubiano riba e tema budgettering; con pa bai

om cu bo cen.

PR di Gabinete di Aruba Sidney Kock a yama e grupo di studiantenan bon bini y a bisa di ta contento cu hopi estudiante a acepta e invitacion pa ta na e encuentro aki. Tambe sr. Kock a bisa cu e encuentro aki a sali afor di e Ban Topa nan cu Gabinete di Aruba a tena aña pasa, na unda e studiantenan a bisa di ta sinti e necesidad cu Gabinete di Aruba lo mester por organisa encuentronan riba temanan cu ta interesante pa e studiantenan. Despues studiementor Shahaira Brokke den nomber di e mentornan a hibapalabra unda e la bolbe enfatisa e importancia di encueñtronan asina pa duna informacion na e studiantenan cu por yuda nan durante di nan periodo di estudio.

E programa a consisti di dos orador unda e prome tabata Franklin Seute, autor di e buki “Living Rich as a Student in the Netherlands” y fundador di e plataforma “Living Rich as a Student” cu ta yuda estudiante pa haya

grip riba nan finanza y disfruta di e bida estudiantil sin stress. Den su presentacion Franklin a comparti tipnan practico, su mesun experiencia y strategianan bon calcula con pa maneha bo placa mihor; di vivienda te cu compra nan diario; genera entrada y traha na un mindset financiero cu confiansa.

E di dos orador tabata Farley Julius van Heydoorn, fundador di BuroVAT y ta traha como advisor “debiteurenmanagement” na DUO, e instancia na Hulanda cu ta duna prestamo pa estudio. Van Heydoorn den su presentacion a conta riba su propio experiencia cu debe y kico esaki ta haci cubo. Tur esaki ta conocimiento cu e ta usa pa yuda hobennan pa haya grip riba nan finanzas. E studiantenan na final por a haci pregunta y asina haya mas informacion adicional di ambos orador.

Gabinete di Aruba por mira bek riba un encuentro hopi exitoso. Na Haagse Hogeschool.

Clasificados

SOLODIPUEBLO@GMAIL.COM

CEL.585 9500


SOPI DI LETRANAN



CUADRADO



RECTANGULO



TRIANGULO



CIRCULO



ROMBO



CORAZON



ESTRELLA



OVALO

A	C	T	A	C	D	R	O	S	T	E
S	O	F	E	I	B	V	A	M	O	S
C	R	B	L	R	F	O	N	I	L	T
T	A	L	O	C	O	L	O	S	G	N
I	M	D	A	U	D	U	A	S	N	A
Q	N	V	H	L	R	G	C	S	A	T
L	C	T	A	O	B	N	J	S	O	P
E	N	U	I	D	A	A	D	O	P	S
A	M	L	A	C	T	I	R	E	L	A
R	O	M	B	O	A	T	E	M	P	P



Oracion di dia

Un dia fructifero y cu e luz di Cristo por briya den cada un di nos

" ... Pasobra tur hende cu halsa nan mes, lo keda humilia, ma esun cu humilia su mes, lo keda halsa". Lucas 18,14

Awe nos ta lesa e importancia di humildad y reconece nos faltanan. Nos por ta manera e fariseo husgando otro y halsando su mes of manera e cobrado di belasting ta reconece su falta y su necesidad di compasion. Cu humildad nos ta sirbi otro sin busca recompensa; scucha mas y papia menos, na balora e otronan pa loke nan ta y no pa loke nan tin of ta aparenta di ta. Reflexionando continuamente ta yuda evita na cay den orguyo y na mantene nos mirada fiho den e mision cu Señor a confia nos. Biba cu berdadero humildad ta nifica rechasa e mascaradanan cu hopi biaha nos ta pone pa impresiona of pa competi cu otro. No biba un bida superficial of di falsedad, sea un luz pa mundo unda e luz di Cristo ta briya den bo. Loke ta importa no ta con otronan ta mira nos, sino con Dios ta mira nos. Ser bo mes y cu humildad ta acerca nos na e berdadero esencia di nos fe y esey ta haci nos un instrumento den e man di Dios.

Oracion : Señor Hesus, haci mi curason pareu na bo curason. Manso y humilde y obedecido na bo Santa boluntad.

Amen.

SUDOKU

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		7	1				5	
				7	4	8		
	2		3	8			7	6
				4	8		1	9
		8				5		
6	9		5	3				
8	7			1	9		3	
		3	8	5				
	1				3	9		

Vivian,
classmate, dearest friend
An end ... so unexpected
No words can describe this pain
Yet hurting and in tears we celebrate you
This lovely being that you were and still
are in our memories of years filled with
carefree joy as teenagers
Remembrances of laughter and silly
exciting activities
that was our youth, our time together at
Colegio
The journey into adulthood has led us apart,
it's true
And it was you who reunited us again after
50 years
Cause that was who you were, a binding
force
Caring, joyful, unique, radiant and authentic
Rest gently dearest friend



Your friends
Lydia, Nidia, Charmaine, Ava, Marwa,
Mariska, Yvonne, Bea, Julie, George and
Nico



Vivian, our dear friend,
you may be gone but your
memory will live on in our
hearts forever. We'll always
cherish the memories we made
in our Colegio years, and we
are so grateful for the time we
shared. May you rest in peace,
and may your spirit inspire us
to be better persons.

Colegio Arubano Class of '72
Lydia, Nidia, Charmaine, Ava,
Marwa, Mariska, Yvonne, Bea,
Julie, George and Nico




CROSSWORD

WORD SEARCH PUZZLE




In The Sky


CROSSWORD PUZZLE



2 Down




5 Across



11 Across




3 Across



6 Down



12 Across



ACROSS

2. "The ____ is the limit" is an expression that means there are no limits and anything is possible.
7. Opposite of "light"

DOWN

1. There are 24 hours in a ____.
4. Opposite of "below"
8. Owls and bats are active at ____.
10. The balloons float ____ in the sky.



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - December 08, 2025

 Sorteo # 4827 7017 9019 9667  X5  Sorteo # 4827 2921  FP  Sorteo # 2883 2617  Sorteo # 4827 7781 Cancer  Sorteo # 1701 908  X3	<table><tr><td> Sorteo # 0 x Jackpot 0 x Match 4+ 0 x Match 4 0 x Afl. 12,00 </td><td> Joker Letter Proximo Jackpot 425.000,- </td></tr><tr><td> Sorteo # 0 x Jackpot 0 x Match 4 0 x Afl 8,00 </td><td> Proximo Jackpot 53.000,- </td></tr><tr><td> Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00 </td><td> Mega Ball Proximo Jackpot 310.000,- </td></tr><tr><td> Sorteo # </td><td> Afl. 410.000,- </td></tr><tr><td> Sorteo # </td><td></td></tr></table>	 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 425.000,-	 Sorteo # 0 x Jackpot 0 x Match 4 0 x Afl 8,00	Proximo Jackpot 53.000,-	 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00	Mega Ball Proximo Jackpot 310.000,-	 Sorteo #	Afl. 410.000,-	 Sorteo #	
 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 425.000,-										
 Sorteo # 0 x Jackpot 0 x Match 4 0 x Afl 8,00	Proximo Jackpot 53.000,-										
 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00	Mega Ball Proximo Jackpot 310.000,-										
 Sorteo #	Afl. 410.000,-										
 Sorteo #											